

發願已周次賞贊頌

桂香殿上惹慈主 教海同流洗業根
業根化作桂花香 善本種成長壽果
一家骨肉無煩惱 七曲子孫同護持
普願今世至來生 紫雲巖前長得道
步步心帝左右 生生世世天主張
骨凡可換形可灰 一點真心自金石

禮訖隨意答祝回向

元始天尊說梓潼帝君本願經

三經同表

元始八威龍文經

黃帝陰符經

混元陽符經

是元

元始八威龍文經

第一

不得而名道之初可得而形道之餘知初者
合元始之祖知餘者契陰陽之樞混而一之
可與天地符

第二

混沌之初中含太虛玄玄之不可測妙妙之
何以元肇判之已餘恍惚有真中之居

第三

谷虛神之存出入于生死之門修之煉之可
不動係之慎之以固根

第四

玄牝之合和其炁交其神以成其子身安得
就疎而棄親得不捨妄而從真知造化之津
可以化吾之民天降地升環之以日月發之

以雷霆誰測機緘之運行不言可以利羣生
斯其用以公天下之情

第五

恍惚惚惚火中生神杳杳冥冥水中生精大
炎於上七返生神水流就下六居生精神會
精以通天地之靈

第六

聞交響者損其虛視美色者奪其精知者逆
之以神不順于情可以守而不更全汝形抱
汝生母使爾思慮營營思慮營營則忘汝形
勞汝生可不慎于真以存其誠陽動陰靜上
下應而成萬物之靈靜不動而何以生動不
靜而何以寧剛柔相兼不為而成

第七

虛而不實所以火生靜而不動所以水清知
此道者性定可以通吾之神心寧可以使吾
炁之流行大哉言之明人之守身不若守神
以神會炁以炁合真是謂至人猶子母不離
其親

第八

以始合終以萬物會一夫聚散之妙可以通
天地之虛實火不以焚水不以溺

元始八威龍文經

黃帝陰符經

神仙抱一演道章上

觀天之道執天之行盡矣天有五賊見之者
昌五賊在心施行於天宇宙在乎手萬化生
乎身天性人也人心機也立天之道以定人
也天發殺機移星易宿地發殺機龍蛇起陸
人發殺機天地反覆天人合發萬變定基性
有巧拙可以伏藏九竅之邪在乎三要可以
動靜火生於木禍發必起姦生於國時動必
潰知之修鍊謂之聖人天生天殺道之理也

富國安民演法章中

天地萬物之盜萬物人之盜人萬物之盜三
盜既宜三才既安故曰食其時百骸理動其
機萬化安人知其神而神不知不神而所以
神也日月有數大小有定聖功生焉神明出
焉其盜機也天下莫能見莫能知君子得之
固躬小人得之輕命

強兵戰勝演術章下

瞽者善聽聾者善視絕利一源用師十倍三
反晝夜用師萬倍心生於物死於物機在目

天之無恩而大恩生迅雷烈風莫不蠢然至
樂性餘至靜性廉天之至私用之至公禽之
制在炁生者死之根死者生之根恩生於害
害生於恩愚人以天地文理聖我以時物文
理哲人以虞愚我以不愚聖人以期其聖我
以不期其聖故以沉水入火自取滅亡自然
之道靜故天地萬物生天地之道寔故陰陽
勝陰陽相推而變化順矣是故聖人知自然
之道不可違因而制之至靜之道律曆所不
能契爰有奇器是生萬象八卦甲子神機鬼
藏陰陽相勝之術昭昭乎進乎象矣

黃帝陰符經